

— Այդ ես տեսա... — ասաց Ասլանը ժպտելով:

Այդ միջոցում ներս մտաւ մի լաւ հագնուած մանկլաւիկ, մի ձեռքում բռնած ունէր արծաթեայ փոքրիկ սրճամանը, միւս ձեռքում մի գեղեցիկ արծաթեայ մատուցարան, որի վրայ դրած էին երկու չինական հիանալի ֆինջաններ, նոյնպէս արծաթեայ տակերի մէջ: Նա, տեղային սովորաբեան համեմատ, լցրեց ֆինջաններից մէկը, նախ տոեց փաշային: Իսկ փաշան, իր հիւրին առանձնապէս պատուելու համար, իր ստացած ֆինջանը իր ձեռքով տոեց նրան, եւ Ասլանը շնորհակալութեամբ ընդունեց: Փաշան վեր առեց երկրորդ ֆինջանը:

Մանկլաւիկը սենեակից դուրս գալու ժամանակ լռութեամբ անցաւ իմ մօտից եւ թեւով կամաց իմ կողքին բօթեց. դա արդէն նշան էր, որ ես դուրս գամ նախասենեակը, որ ինձ էլ ղահո՛ւ է խմացնէ: Բայց ես չշարժոեցայ իմ տեղից: Այդ շատ զարմացրեց նրան:

Ղահո՛ւէից յետոյ մի այլ մանկլաւիկ, ավելի լաւ հագնուած, նարգիլէ ներս բերեց, որը իր գեղեցկութեամբ բոլորովին ապշեցրեց ինձ: Նրա գլուխը, որի մէջ թամբաթու եւ կրակ էին դրած, շինուած էր զուտ ոսկուց եւ զարդարած թանկագին քարերով. օձապտոյտ «բուլղարիի» ծայրը շինած էր մի թգաչափ երկարութեամբ դեղին սաթից, որ նոյնպէս բռնուած էր ոսկու մէջ: Նարգիլէի տակը, որի մէջ ջուր էր ածած, շինուած էր ադամանդի նման փայլուն բիւրեղից, որ զարդարուած էր գոյնզգոյն ծաղիկներով: Փաշան նարգիլէի վերաբերութեամբ նոյն քաղաքավարութիւնը գործ դրեց, ինչ որ ցոյց տոեց ղահո՛ւի ժամանակ, այսինքն՝ նախ ինքը ընդունեց սպասաւորից, յետոյ իր ձեռքով առաջարկեց Ասլանին:

— Դուք արդէն փոքր ի շատե՛ ընտելացել էք մեր սովորութիւններին, — ծիծաղելով նկատեց փաշան: — Ինչպե՞ս է թուում ձեզ մեր նարգիլէն:

— Ես խիստ ախորժանութիւն եմ, — պատասխանեց Ասլանը, — Պոլսում սովորեցի:

Ղահո՛ւն եւ նարգիլէն ընդհատեցին նրանց խօսակցութիւնը: Փաշան, կամենալով շարունակել այն, վարպետութեամբ հարցրեց.

— Զա, մոռացայ, ինչ բանի վրայ էինք խօսում:

— Դուք ասում էիք, որ հիմա գառն ու գայլը միասին են ապրում...

— Այո՛, հէնց այստեղ ընդհատուեցաւ մեր խօսակցութիւնը: Որովհետեւ սիրտս լցած է, թոյլ տոեցէք ինձ, պարոն բժշկապետ, փոքր-ինչ շատախօս լինել: Եւրոպան մեզ մեղադրում է մեր անմարդասիրական վարմունքի մասին քրիստոնեաների հետ, իբր թէ նրանք ճնշած են մեր երկրում, հալածո-